

北京師範大學圖書館藏稀見方志叢刊

十

北京師範大學圖書館 編

北京圖書館出版社

彭澤縣志序

我

皇朝龍興四十餘年道洽澤潤窮髮不毛
靡弗稽顙來庭獻琛恐後車書一家
幅員廣輪振古無有宜有職方之紀
一統之志以風示寓內非獨爲

太平之黼黻休明之鼓吹也抑將以攷

太山川之險易詢風氣之剛柔辨習俗
之貞淫察戶口之登耗因而就溪就
淺以上下其治裒益其施馴擾調娛
優柔饜飮自然而躋於平康正直之
世焉耳矣然則輶軒之使下採方輿
會計之書上登中秘謂非

今日之先務哉先是

天子用輔臣議

詔郡縣各修志以

聞天下奉行而纂輯者什二三旣而封
狼用殄海波不揚衅甲橐弓旋

詔促成而天下之承風者什六七今則省
彙郡縣之志而爲通志

部限程督 憲檄交午天下之告成

者什而八九矣彭澤始皇皇修輯凡
閱三月而事乃竣何其後也蓋由彭
而言則兵燹游臻而文獻無徵也由
藩而言則攝承日淺而政教未洽也
彭邑前此嘗有志矣在明萬曆壬午
距今百有餘年其間迭遭焚剽鏤板
既燼陳編亦湮窮搜密購乃獲一帙

以爲張本及詢彼後事而故老無存
動淹歲月神揆意索始與近事相承
此則文獻之無徵有不容不後者也
夫志也者寧獨定其區輿識其風土
詳營建之廢興明秩祀之崇替覈賦
役以恤民艱述官師以仰循績紀選
舉人物以徵靈秀所鍾錄藝文雜說

以覘英華所洩云爾哉宰是邑者其
敷政立教之迹將於是可尋也藩
自辛酉待罪二載於茲見彭民好訟
而喜爭而亟思所以變之也其地衝
民苦於役則爲均之使不偏於累其
俗儉民畱於財則爲寶之使不橫於
出其強食弱肉也則爲破情面以衛

之其闔於室而闔於墻也則爲明倫
紀以訓之其喬野而罔知奉上瀆也
則爲講

十六諭以牖之然起視其民未見有革
心而嚮化者豈非藩之治本未善而
爲日又淺以致然歟斯則惴惴焉獲
戾是懼雖欲不後而又不敢矣雖然

稟

章程而兢兢採輯辭休卧而汲汲纂修
具有成書用告不敏則駑駘之後與
騏驥之先均息轅休秣於家廐而已
矣

告

康熙二十有二年歲在癸亥重陽日知彭

澤縣事臯城王廷藩題於龍城公署



月
三

彭澤縣志舊序一

士君子立身天地間必有大本蘊於中然後有大用見諸行事可以建諸天地質諸鬼神載之簡冊而垂示無窮也姑蘇凌侯杞以雄才碩學來令彭澤二年政通人和暇以邑志弗完孜孜考索以補之粲然成書俾此邑故實百里而廣百世而遠觀者可一目盡侯亦可謂善用心者矣吾嘗以爲令一邑則以一心而通一邑之人心守一縣則以一心而通一縣之人心宰天下則以一心而通天下之人心蓋其胸中大本已具而所以運籌定策設施措置凡見諸用者可以建天地質鬼神傳之

永久蓋聖賢彌綸參贊者端乃如此若夫山川之險要
土地之腴瘠人物之盛衰生齒之登耗風俗之淳漓政
治之得失脫胸中有未了了則措諸政事能無倒行逆
施置生靈於鴻鴈嗷嗷之地耶此艷邑之志所以不可
或無而吾夫子所以必水土之襲而痛杞宋之文獻不
足也侯此編之舉意不在於此哉意在於此不謂之善
用心可乎噫有大抱負者之作用自與俗殊也管靖忠
二公嘗先後治斯邑一以名節著一以治功顯其大本
大用雖已播諸聲詩勒諸金石吾恐畫馬之筆不能盡
其毛也嗚呼彭澤雖小邑也其江山增重而望越他艷

孰謂非此英雄豪傑造化中來哉後之繼宰茲土者
同期無愧

成化二十一年歲次乙巳中秋賜進士出身翰林院修
撰泰和曾彥書

序二

夫志所以紀一邑之事文獻所徵不可無也彭澤爲古
名邑徃徃得人治之其故實前令凌君雖編輯鋟梓亦
已久矣徃者不能無略來者不能無遺余自抵任來欲
重錄而修葺之事冗未克迄得太學友是邑陶堅待選
于家遂相與詢故訪舊補略拾遺以公去取斯爲全書

用壽諸梓庶咸有所考證焉若以余爲能言文事而言之則失之矣

弘治甲子九月九日彭澤縣知縣長沙王琦謹題

舊序三

夫志古國史也以紀輿地食貨建設風俗秩官選舉思命人物藝文之制貴詳而有體豈易言哉九江郡志兼載彭澤而未詳也迨稽邑志幾漫滅矣豈文獻之不足證亦吏茲土者之非其人爾判府葉君三攝邑篆銳意重修以妨庶務未遑也適浙之戴君震亨來署學諭博洽有史才廼馳轡往告數然允之三越月而纂成

請叙余惟彭澤吳越要衝其先壽春地也山峻土沃俗
尚文儀儒風相續民習經商婦事織紵舉葬不作佛事
頗稱醇厚間有婚娶論財至不育女鄉之十九二十都
民健鬪喜爭積猾更滋侵弊而治道微矣余承明命叨
守是邦論財健訟之風駸駸向化而欺隱占奪弊亦頓
革獨於戶田城垣地方急務而綜理未逮竊有憂焉我
督府王公撫巡江右爰下令丈田審戶築砌城垣余以
葉君才可肩任屢爲區畫覬覦相成是以田土聿增二
萬戶口亦清審除報不差若夫城垣創制猶悉按彭澤
縣治依鳳凰山其形如椅惟缺其前舊有土城久圯游